

INTANT CHE A ROME A SI CAVILE...

E jè une detule viere tanche il cuc che, intant che il senât roman al stave cuistionant sui jutoris di mandâj `e sitât di Sagunto, in Spagne, Anibal al à vude dute la comoditât par dâj la gafe `e sitât e paronâle.

Une robe su par jù compagne nus sucêt a nô, in chest Friûl colonie dal inperi partitocratic roman - talian. Se no vin la strente di un nemî fisic, o vin però il berdei di problemis granc' come une mont, ch'a sares ore passade di disberdeâju, se lajù, tal senât roman che par disgracie o par distin nus parone, a vessin dome un pêl di cussiense.

Si è tant usâz a sintî a fevelâ di crisis e di barufis (aromai i "senators" no si dan dongje par cjapâ provedimenz ma dome par spartîsi la torte e par gjavâsi i vôi), che si cîr di "ganbiâ canâl". Come se girant il pomul dal casselot, i problemis a rivaressin a vê une soluzion. Brut cuanche un popul al fâs il câl ai scandui e ai spiêi negatîfs di chei che lu ministrin! Al ûl dî ch'al à pierdude dignitât di se e sens morâl.

La crisi vierte sul scomencâ dal cjalt e sierade o repecade apene jentrade la canicule, la int no le à sintude tanche un fat di une gravitât straordinarie, come di un sisteme ch'al puce di frait e che nol lasse lumâ sortidis, amancul in curt. Aromai socialisc' e democristians a son tant sigûrs di vê in man il podê, ch'a fasin e a disfin ce che ur pâr. Adiriture a son vignuz fûr cul pat "biblic" dai siet agns, sigûrs che la int, cjapade tai siei berdeis di proviodi a misdî pe cene, no ur darà nissun fastidi. Se cheste no je rogance dal podê!...

Ce efiez àno, chi di nô, lis barufis seguitivis fra De Mita e Craxi? No si trate dome di doi prepotenz ch'a zuin su la piel di dut un popul. Lis lôr pratesis mafiôsis j puartin danp a dute cheste Italie che si presente sinpri di plui, amancul a nivel intenzionâl, tanche une pajassade "storiche". In Friûl, une crisi di guviêr a conpuarte amancul doi ritarz che no podìn par mai perdonâur i *bêz pe ricostruzion ch'a no rivin e la leç pes minorancis che no va indenant*. Dutis dôs cuistions vitâls pal nestri popul. E chest no si pò lassâlu cori. No podarin fâ cuissà ce, ma amancul inpensinsi, cuanche a vignarà la volte, che chê int li, chei dal pentapartît, no si à di votâju. Parceche a son int cence cussiense, che pes lôr cunbinis e trainis e gjelusiis nus dinein a nô il dirit di vê un sotet dopo une tragjedie come chê ch'ò vin vude, e di podê fâ valê il nestri bon dirit di popul sclâf dal malguviêr talian.

Cui àjal il fiât di lâ a dîur ai baracâz furlans che e àn dirit di vê i bêz, ma prime di lôr e àn dirit i democristians di dâur la volte ai socialisc' tal cjapâ la poltrone dal Palac? E cui si sintaràjal di dîur a di chei che àn firmât pe lenghe furlane, che àn stât a Rome a butâ vie bêz e timp e inlusions, che la cuistion si sistemarà apene che lajù a varan finît di barufâ? J girin la domande ancje al vescul di Udin, Battisti, e ai siei copâris "furlans", ch'a erin sigûrs, l'an passât, che tal gîr di doi mês, Craxi al vares fate buine la leç pe aplicazion dal articul 6 de Costituzion e podopo il Vatican, a spron batut al vares dât il permes di preâ te nestre lenghe. E intant che i mês a diventin agns, podino amancul porconâ?

Biel che a Rome i sorestanz si permetin il lusso di barufâ su l'alternance, par colâ tal solit pastiel ch'al dure di Nadâl a san Stieffin, cun grant prejudissi di dut e di duc', no podaressino amancul lassânus ancje a nô un sclip di alternance? Dopo 120 agns di casins, di vueris, di emigrazion, di bausiis, di promesis fatis e no mantignudis, no podaressino mo "clamâsi fûr?"

Nol è di vuè che ogni biel bâl al stufe...

Editoriâl de La Patrie dal Friûl di Avost dal 1986, n. 8